

Anis Food tembusi pasaran 7-Eleven

Oleh AQMAR ALLADAD
aqmar.alladad@noirino.com.my

SHAH ALAM - Syarikat pengeluar dan pengedar kek coklat jenama Anis Chocolate Melt, Anis Food Sdn. Bhd. (Anis Food), memperluaskan lagi pasarnya dengan menembusi pasaran kedai serbaneka 7-Eleven di Lembah Klang sejak dua bulan lalu.

Ketua Pegawai Eksekutif Anis Food, Junaidy Abu Bakar berkata, sebanyak 6,000 bekas kek coklat telah dijual pada bulan pertama ia ditawarkan di pasaran baharu itu.

"Setakat ini, kek coklat keluaran syarikat kami sudah berada di 500 cawangan 7-Eleven di Lembah Klang dan dijangka diperluaskan ke Johor Bahru, Johor, Kuantan, Pahang dan Kota Kinabalu, Sabah pada tahun ini.

"Ini merupakan usaha kami untuk meletakkan produk ha-



HASAN (kiri) memperkatakan sesuatu kepada Junaidy mengenai produk Anis Food selepas majlis pelancaran aplikasi Anis Choc di Shah Alam semalam.

lal, tempatan dan bumiputera di pasaran lebih luas serta berdaya saing," katanya pada sidang akhbar sempena perluasan perniagaan itu di sini semalam.

Turut hadir ialah Menteri Perdagangan Dalam Negeri, Koperasi dan Kepenggunaan,

Datuk Seri Hasan Malek.

Junaidy berkata, Anis Food mengunjurkan jualan sebanyak RM15 juta pada tahun ini, berbanding RM10 juta pada tahun lepas, bersandarkan pengembangan perniagaan ke luar negara dan pembukaan kilang baharu.

Syarikat tersebut kini memiliki empat buah kilang yang diiktiraf Amalan Pengilangan Yang Baik (GMP) serta piawaian Titik Kawalan Kritikal dan Analisis Berbahaya (HACCP) di Seksyen 13 dan Bukit Jelutong di sini, selain di Sabah serta Indonesia.

"Kilang baharu yang menelan kos RM5 juta itu akan membantu meningkatkan kapasiti pengeluaran sehingga 50,000 bekas sehari berbanding 15,000 bekas sebelum ini.

"Pasaran yang semakin berkembang memerlukan kami mempunyai kilang yang lebih besar supaya dapat memenuhi permintaan," jelasnya.

Terdahulu, Hasan turut melancarkan aplikasi mudah alih, Anis Choc, untuk memudahkan pembeli mencari lokasi jualan, promosi dan maklumat mengenai produk Anis Food.